

四庫全書

集部

欽定四庫全書

集部

圭塘小藁卷一

五

詳校官編修<sub>臣</sub>錢樾

中書<sub>臣</sub>劉源溥覆勘

總校官編修<sub>臣</sub>王燕緒

校對官編修<sub>臣</sub>徐立綱

謄錄監生<sub>臣</sub>于世第

欽定四庫全書

集部五

圭塘小藁

別集類四 元

提要

臣等謹案圭塘小藁十三卷別集二卷續集一卷元許有壬撰其小藁為有壬所自輯至正庚子其弟有孚錄而序之所謂即至正集而不具錄者也迨有壬既沒集本散亡而有孚所携此本獨存因重加編次得詩文二百

四十三首釐為十三卷又輯嘗記有孚詩文  
八十五篇緱獻可所收文過集及林慮記遊  
詩文九十三篇為別集二卷其殘編斷簡得  
於倚尖野人家者為外集一卷有孚復為之  
序題屠維作噩二月乃洪武二年己酉在元  
亡之後矣子孫世藏其書宣德間復失其外  
集成化己丑其五世孫南康知府顥始校正  
刊行而以家乘載誌文祭文及有孚等唱和

之作編為續集一卷附之於末葉盛水東日記曰相臺許可用中丞文章表著一時有盛名今世所見者可數耳耿好問言其裔孫顯尚藏文集若干卷惜乎不得見之即此本也其後至正集復出於世而闕佚未全今以兩書校核雖大略相同亦互有出入其他異同詳略甚多以其為有壬手訂原本又經有孚排定視集本之晚出者較為精詳故並著於

錄以備叅證焉乾隆四十六年十一月恭校

上

總纂官臣紀昀 陸錫熊臣孫士毅

總校官臣陸費墀

圭塘小藁序

故翰林學士承旨集賢大學士光祿大夫兼太子左諭  
德圭塘先生許文忠公往年特命為中書左丞以不得  
行志辭歸御史臺臣奏於上曰許有壬德兼體用學究  
天人正色立朝誠心報主比居管轄之地益彰輔弼之  
忠誠所謂臺省老成中外具瞻者也為御史中丞歸臺  
臣又奏曰中丞許有壬謀猷聞望為國老成德業文章  
超出時輩立朝大節歷歷可稱其在位也竭忠礪節冰

藥自持扶持紀綱表礪庶府抗論不阿於權貴嫉惡尤  
過於往年誠不負聖天子眷注之隆中外具瞻之譽玉  
音嘉納寵錫頻繁此天下之所共知初不待於劣弟之  
論及文章特餘事爾但平生性稟經籍外無所嗜好世  
俗所重可以為子孫計者悉不存於胸中昆季間恪守  
先公之訓而終始不渝者公一人爾故居宰路韋布不  
殊幾務方殷著述不廢况閒暇乎門生集錄成一百卷  
名至正集同年歐陽公為序可必傳者也當時翰林太



常院國子監俱移公牒各求一部貯之書庫以備徵討  
以淑後學先生謙讓未遑也諸生亦繕寫工畢不幸值  
先生捐館有孚亦以議禮忤時宰意遷守相州道路阻  
修不知其後還送上官以遂諸公公議否昨聞猶子太  
常博士楨忽遭起遣倉皇之際輕身南行書籍家貲悉  
皆棄擲至正集冊帙重大必不能顧藁亦併亡使先生  
平生著述淪沒無聞深可痛惜然而竊聞軍中多具眼  
者斯文天相或遇知音必不毀棄苟存全集未可知也

行橐中止存昔者應酬諸人所謂圭塘小藁而有字為  
序之本幸無失墜力疾編類得賦四古詩二十五歌行  
十二律詩四十四絕句三十五序十八記十六碑志十  
一贊五銘二辭一題跋六文一長短句六十三總二百  
四十三為一十三卷酬贈及見寄有孚詩文贊議跋銘  
傳記長短句共八十五為別集上綴獻可出其先世所  
收文過集并林慮記遊詩文共九十三為別集下而其  
殘編斷簡得於倚尖野人家者為外集一卷繼小藁後

并目錄共一十六卷以示子孫所謂存十百於一二也  
嗚呼惜哉昔祭酒宋本誠夫之歿也弟顯夫以其文求  
公序公極美顯夫能以其兄之文著于世傳于後可謂  
能弟誠夫可謂不死今若此豈惟負父兄之訓而他日  
亦何面目見友朋於地下乎況文集之外如漫錄漫總  
二書又皆干係朝廷政務登載用舍人材將來足備文  
獻徵考今亦喪亡視顯夫為愧尤重嗚呼天地有窮此  
恨無窮也痛哉痛哉屠維作噩春二月既望弟有孚引

欽定四庫全書

目錄

序

欽定四庫全書

圭塘小藁卷一

元 許有壬 撰

古賦

迷樓賦

予總轡政廣陵禱雨雷塘掾曹汝霖從歸途說江都廢  
興荒煬始末周覽山川闐闐樓居之盛而又及迷樓焉  
傷而賦之其詞曰

有樂不縣積塵斷絃有美不御老醜備前於是前星晡  
乎其無光少海一變而為田矣天厭隋祚憂不在敵胎  
於心腹成於肘腋以五子一母列據雄鎮為可恃而不  
知大都偶國為禍之尤劇方荒隋之好學接士也固莫  
辨其真偽及其留麗華而怒高顙則惡緒已暴於中外  
惜猛虎之不知竟為毛間蟲之所噬黃腸甫湊金合已  
賜麀聚居廬龍飛天位弛然自放於九重之上天地萬  
物無一物之可畏遂肆心於巡狩傳粉深宮笑江東之

諸帝車轍馬跡將徧九州北巡榆林既讐其酋耀兵河  
右瀆武東陬引汴水開邦溝置離宮造龍舟伊江都之  
勝麗詎一豫而一遊天亦厭乎我民欲一旦而盡劉百  
萬億之蚩蚩乃生項昇之巧萃倖般於心匠委財幣於  
電掃按圖締構不日成之璇室愧陋摘星笑卑傾宮謝  
侈阿房讓奇章華姑蘇撮土何施建章栢梁廣猶可稽  
叔寶三閣華而不微軼古罔後舉莫我夷於物靡曼於  
粲珍瑰寶帳散愁而延月復有酣香而忘歸亂晝夜於

多景鬱烟霧之霏霏晶熒奪目孰辨遠邇縈紆倚足曷  
明東西巢燕亦惑乎網戶車羊尤眩乎竹枝弄臣肆誤  
以資笑阿媼雖習而猶疑入者罔識其所從出者莫省  
其所蹊一蟻逐肉林之臭一蜂憊花島之飛蠅遭拍浮  
而醉不可解舟入溟滓而維無所施又如鷓鴣不能悉  
鄧林之樹小鮮豈暇窮滄海之涯俊娥孰何安之車錫  
名實來夢之兒下俚稚女孰究其姓字如侯夫人之死  
者蓋漫不知吁嗟獨夫心蕩神疲尚能名之可謂曰迷



昔在帝堯法宮是作舜闢四門以撤壅遏明堂政令辟  
雍禮樂究義資訓德修罔覺遠不軌與不物實儀刑之  
攸託三苗義和昏迷致兵政教不迷在書可徵威儀卒  
迷詩具刺懲盤盂几杖微且有銘異哉茲樓以惡著稱  
謂真仙亦迷於此地何虔通突至不迷于厥行向使中  
原無叛天復假齡殆將作七千五百里之臺而盡糜天  
下之蒼生矣人不知過或肆無忌苟知其非敢作而遂  
觀其引鏡念頭頸之且斫觀天識圖儂之將至既灼然

而自知乃確乎其自弃蓋柔終而無改過之勇厚極而  
有難開之蔽迷於心者若是其大迷於樓特其細也高  
岸為谷深谷為陵樓傾土平傷哉蕪城乃為之歌曰蕪  
城蕭蕭兮草離離繁華漸盡兮瓦礫不遺昔之迷不可  
復兮無俾世迷

弄田賦

元統甲戌有壬承乏中臺嘗與議農政因語農官上林  
隙地可規治藝五穀若古弄田皇上幾暇監農不易迂

而實切其說既不行且有竊笑之者噫古制之不復者  
多矣豈獨是耶感而賦之其詞曰王政之大無以加於  
農乎林林總總以食為天茹飲俗變稼穡興焉唐虞至  
聖命稷是先蒼姬八百年之王業實基於生民之篇炎  
劉去古而未遠貽謀亦慎乎其傳未央宮中不事流連  
樹藝有地是為弄田謂昭帝幼冲未能親於帝藉鉤盾  
近省姑試耕以為劇何考信之不覈致流傳之昧實蓋  
祖宗為敦本而設雖曰遊弄而亦不忘乎稼穡也天下

之治生於敬畏目擊之頃知農夫之艱難粒米之不易  
有不惕然而悟凜然而惴者乎其為弄也非奇技淫巧  
以斁常也非狗馬遊獵以導荒也非鄭衛哇邪以塞聰  
也非妖艷靡曼以作矇也非以人為翫若董賢鄧通也  
日底天廟土脉膏滋爰驅轂鯨倣載其時耷而人立甚  
險竿之岨危播而子落若淵客之珠璣人牛前逝牽石  
後隨又如跳丸之飄忽走索之飛馳俄青條覆乎畦畛  
何眩人之能為惡莠亂苗尤務去惡俄頽俄栗恡恡其

獲蓋始于舉耜而終于鉅艾莫不可翫而可樂顧俳優  
之褻狎器物之不軌魚龍曼衍之鄙吞刀吐火之詭何  
足以辱天視之一睨哉若稽耕藉有國大教王后供種  
太史播告秉耒一墦朱紘有耀神倉鍾藏冢宰舉要所  
以勸農民供齊盛而事天地與祖廟也三代共由之大  
典百王不廢之要道何周宣中興之哲王乃不藉其千  
畝至形號文公之譙則江東之未暇又無足與校也開  
元之盛種麥苑中太子侍登治並古隆是亦弄田之遺

意惜其有始而無終於惟我朝登三邁五南郊畇畇有  
田千畝大臣代耕歲事修舉而齋宮尚稽於享醴玉跡  
未親於舉武是以奮庸之士拳拳有望於復古昔周公  
之相成王也書有無逸詩有七月知稼穡王業之艱難  
丕顯文承武之謨烈率婦子而親觀宜詩人之播詠臣  
願割苑中數畝之隙俾從事於播種備春秋之遊豫洵  
未央之名弄然後講三推之儀明五禮之重臣敢陋潘  
岳江淹之賦復有周之雅頌也

鬪駝賦

元統甲戌九日上幸後苑觀鬪駝有壬適有奏對獲遂  
一觀退而為之賦曰

吁嗟乎駝爾軀孔碩爾能實多龍斯夭矯山斯嵯峨生  
鄯善之絕域邈流沙而迅過日三百猶跬步輕千斤之  
負馱方炎風之煽毒劇殲人於札瘥爾乃即沙滅口警  
候匪諂度磧渴水口塵莫吐迹蹋而鑿涓涓盈科其或  
修程阻艱芻秣罔繼洩麩茹銜糾纏堅閉浹辰無饑萬

里不遠校地用之凡獸茲實氣稟之尤異者也蹠不介  
甲踣鐵其堅肉鞍嶮嶮雙峯矗聳復有傑出一峯巋然  
力倍恒品直當萬千其穹莫扳抑之即從彌耳伏地屈  
足漏空累乘駢坐奚婢塞童引繩掣鼻自西自東昂首  
噴穢呼園生風翠釜之珍其忍取供流潼甘馥馬酒釀  
醲墮毳紉緝褐被域中風土既習字育日豐板襜其雛  
推紫茸茸冶銅象形僅得其槩疥不媼媚劉文適類景  
純著贊論功遺大歷唐及宋紀述未備皇元御天西北



首賓大笠效貢泉渠空羣魚魚連連列殿雲屯千乘萬  
騎灤水歲巡負鼓先聲服箱後塵背錦模糊珠璣霏  
鈴鐸殷地旌旆盪雲開闢而下有國之有馳者未有若  
我朝之殷也牧橐分職秩浮令丞負重致遠人知其能  
有知其出拔之奇搏擊之精者乎苑草未凋風日清美  
九重幾暇鳳輦蒞止俯察品彙縱觀物理虎賁執纆兩  
兩相睨騰威傾奔若歛徒倚待怒氣之既盈俄侵陵之  
漸邇脫羈發縱勢邁角觝始齧頸而躑躅復摩肩如委

靡乍分立以卽隙遽挑釁於駉駉飄忽若風燕盤旋如  
磨蟻劃然踴躍人立對起波瀾土墳雷轟電駛持久跼  
跼勝負未決貂璫聲援陞楯肯裂餘勇雖鼓虛驕已竭  
嗟兩雄之相厄卒不遑乎一蹶勝者植立揚揚自憚主  
矜調擾望拜斃躡天為噤噤賜香綰帛嘗聞單于祭三  
龍祠以是為樂龜茲觀七日戲以占耗息今始得以驗  
其說鄙哉季邱芥金其鷄杜鄴走馬時在側微開元南  
面何取於斯顧羽毛之瑣瑣漬黼辰之巍巍而登牀之

舞馬亦不過示異於宴嬉又孰若大逾犀兕猛軋虎貙  
可以鼓吹飛之士激羽林之孤者哉小臣在列顧瞻震  
栗悸定而懾氣塞而釋目隘而豁足痿而力歸來人間  
塵土坳集袋馴白唐原缺促織黃雀山鷓種種有敵下  
里何知小兒方劇觀於海者難為水曾何辱乎目擊然  
臣有芻蕘之言增渤澥以涓滴大小雖殊玩物則一惟吾  
皇遊六藝之圃徵勝負於往昔愚臣一第非手搏而得  
視試卞為期門之徒亦粗可以備顧問而陳得失也

三臺賦

至正三年九月二十四日有壬偕明初馬徵君遊三臺  
明初有長句既次其韻永歌不足又作是賦其詞曰

歲癸未秋九月霜清寒薄天宇澄澈塗無長泥庭有積  
葉高陽子逸興作呻畢輟趣膏秣事登涉壺清露之芳  
醞從白眉之佳客乃渡清洄稅駕乎鄴覽山川之形勝  
弔陳迹之未滅客乃指顧而告曰子亦見夫三出之截  
薛者乎氷井峙北金虎距南銅爵巖巖中立而三若稽

作者振古所慙欲祛我銜不能縷談子亦欲聞其凡乎  
高陽子曰嘻昔有塗巷話古事及漢季小兒聞曹敗則  
大喜劉蹶則顰蹙而出涕蓋人心天理之所同況怒其  
人而履其地因其跡而聲其罪不亦宜哉客乃言曰吉  
利之生姓不自知由嵩已冒夏侯何稽舞戟禦捕啖葛  
如飴誑叔以疾拒客以泥睥睨一世岸然肆欺雖橋何  
之見異卒莫逃子將之譏謂興義以寧國致羣材之景  
隨爾乃劫遷乘輿地尊天卑彝倫攸斁大厦以墮及乎

袁尚既敗審配亦摧黃星斯應赤精遂微入鄴領冀州  
之牧中天植不臣之基慮幾人之稱王乃居之而不疑  
幾簣幾杵成茲崔嵬子午梁貫愈出愈奇三山鼇戴雙  
闕鳳飛連薨複道相為蔽虧累棟山積周軒雲齊陽宮  
冬熙凌室夏淒審曲面勢有巧無遺衡漳浩浩乎其北  
隆慮靡靡乎其西牧千里於寸眸萃萬景於一時卷山  
河而匪席指風霆其在顧應劉王徐倡酬諏咨登高能  
賦家有陳思父子放志欲長若斯天道惡盈樂極則悲

撫冲弱之季豹顧婉孌之蛾眉語託人而哽塞惟泣血  
之漣洒痛富貴之長違遽盡露其情狀彼一牀之八尺  
容幾許之總帳要脯糒於朝晡競聲樂於朔望分香衣  
而造履組舉瑣瑣於屬續其橫槩賦詩之雄發壁裁后  
之威奄忽而俱喪匪不及乎篡代丕蓋默定於主鬻鎖  
諸妓於幽闈望西陵之莽蒼念舊寵而興悲抑茹怨而  
自愴霜鴈訴秋露花泣春牢木行拱几筵有塵哀絃急  
管其聞不聞事往跡存如惡不陳夫以精舍二十年之

規欲媒孽萬年之為君不知司馬家兒已瞠乎其側而恥於附其翼攀其鱗也徒為趙燕魏齊之張本因之增侈重困乎吾民幸疊障之不鏟俾表惡於無垠今吾與子效小兒之顰蹙申欺孤之公議傾壺中之清醇澆胸次之硯磊且以酌漢室征西之將軍魏家創業之武帝子以為何如高陽子聞而笑曰瞞乎瞞乎如客之言則爾之罪窮天地亘萬世而不可貫矣然誅則以心論言不以人廢乃歌其歌曰對酒當歌人生幾何憂思難忘



惟有杜康於是引滿竭壺興盡而返回望三臺渺蒼茫  
乎醉眼

圭塘小藁卷一

欽定四庫全書

圭塘小藁卷二

元 許有壬 撰

古詩

神山避暑晚行田間用陶淵明平疇交遠風良

苗亦懷新為韻 十首

田塍晚獨策及此時雨晴東畦與西疇泱泱流水聲豐  
年已足歡清風復多情歸來藉草坐濁酒還自傾不用

澆碑磊我懷無不平

寢迹非絕世雅志便林丘青山足一至勝處靡不遊意  
適輒忘返茲焉夏已秋遙遙目力窮青青盡田疇迷復  
幸不遠歸歟無異謀

脫身豪俠窟里氓締新交愛其心無穿不較醉語謔生  
兒更有教治地盡肥境禾黍已在眼瓜蔬早登庖愧子  
良已多况敢希由巢

浮生苦無惊道近人自遠重外樂徇身遺世幾赫咍老

農初不知遑遑歲年晚清晨負耒出日夕行歌返悠悠  
千載心他人莫予忖

落日照我影頽然溪水中涼颼動絺衣勢欲凌虛空顧  
之一大笑與爾將無同昔也爾何達茲焉爾何窮莫道  
山林陋乃有黃虞風

昔人植松栢映蔚彌崇岡不為朝夕利千載當自長植  
槿非不榮我圃因之荒白髮走畏途途修馬非良桑榆  
賴非晚此樂且無央

靜念少日事躁中劇擾苗欲令千載淳反之在一朝斥  
鷃不自量上欲搏扶搖世怒任盲俗林譏愧清謠傲骨  
日已長及辰事逍遙

淵明昔歸休開歲纔五十我雖年近似我道慙什百兼  
金與尺璧敢取儕瓦礫緬焉動真想迅往孰誘亦庶幾  
歸田園千載可同迹

我聞昔桃源民風近無懷茲山亦深窈中有讀書齋但  
絕車馬迹不惜雲烟埋旁圍靡靡山上蔭高高槐卿以

永今朝得酒從無賒

我髮日以變山色日以新舉杯試問山古今閱幾人我  
非山主人聊為山之賓杖可入幽險詩能寫清淳但恐  
我他適山乎爾誰鄰

謝吳閒閒大宗師寄鶴氅衣

逆駢欲遺世異服事繆悠恭也差可觀未是真仙儔因  
服究其衷有懷小竹樓一時示蕭散千載瞻風流鄙人  
冒朱紫因循成白頭衣錦不尚絢褫帶宜承羞歸來作

褐父敝縕寒無憂老仙獨不棄謂可同真遊解衣遠衣  
我意重千金裘高義固多感濁骨難崑丘披之焚香坐  
世慮忘囂湫神仙未能學願學王黃州

陳芝田寫余真對之小酌戲成四韻

今日我與汝相看各華顛亟呼尊酒至我飲汝茫然他  
年我長往酒但酬汝前悟此一大笑沽酒休論錢

和林春野見寄韻 二首

山中真可樂經旬無客來羣材足梗楠小臣甘草萊君



看倦飛鳥投林不徐徊咄爾迷途人  
悵悵自紆回海鷗久已狎鷗鵲復何猜  
秋風看木落春風看花開既種子猷竹  
亦有逋仙梅先生可休矣大夫亦賢哉  
高步雲漢濶蹢躅能陪尚可學采藥談  
笑到天台

又

士生如大木皆欲架明堂寧知施用處  
用圓吾乃方歸來何所事琢句敷腎腸  
既為烟霞癩復作花月荒一壑今已專  
萬景身可當山空白石爛雲盡青天長  
故人遠

相慰魂辭聯夜光一展發曄曄再誦鏗琅琅貞松無冶  
容老桂多古香三復如見君歲晚誰能忘

宿臨湘贈誠之監縣

北風櫓聲乾晚泊斷磯下雲岫浮修蛾霜生入平楚鴻  
鴈無處尋落日不可畫重岡護巖邑百里寄民社藉甚  
賢大夫居然魯恭化豐年足粳稻沃壤滿桑柘我如無  
心雲底事勞候迂爛醉得詩歸江山非傳舍

李伯徵中丞奉東宮命作椎結請紀其故以百

字頌而祝之

總角習義方結髮事明主櫛縱豸且韶勤勞幾寒暑青  
皇一顧中遂與國人伍區別垂翼雲歧分戢鴉羽昔我  
秋谷公紀搔淨寰宇象賢實無愧冠服儼前矩願言壽  
而康三握勿為苦他年麟閣上雪鬢照簪組何用拭肝  
石道貴隨所處老我任飛蓬謠詩美繩武

次韻可行記圭塘草木

八首

吾家青牛君伯仲龍矯矯不似丁令威暫來立華表鬼

神護芥片風霜幾昏曉摩挲左紐文曾見陸為沼

又

徂徠以多賤吾圃斯拔萃遠從他山移清與幽境會樂  
天才四十栽爾已興慨吾年六十三方期翠成蓋

又

長公有名言不可居無竹僕僕斲蒼苔森森植寒玉聲  
來書幌清陰入酒杯綠何須更晚食此君足當肉

又

蒼官昔多事乃與羣鳥鄰何如在圭塘亦勝居神囷老  
根已作石霜皮不成鱗不用歎不遇參軍能寫真

又

朝來花斬新暮雨墜紅濕藤蘿助奇觀羅帔層層碧昌  
黎性苦隘政爾要蒙羃一笑問秋乎還能誨人奕

又

披披青羅扇敷陰圭塘阿夏牕雲影薄秋枕雨聲多翰  
墨聊復爾風霜其若何休教近湖石掩映美人歌

又

人生念慈親堂階多樹萱忽隨靈椿化冥漠俱高騫此  
憂詎可忘肝摧不能言對花羞自慰白頭還抱孫

又

昔人避秦亂川原多種桃我幸遇明世栽培胡自勞看  
花食其實為圃豈不遭疎懶強鞭策猶勝宅不毛

寄歸彥溫

林慮吾郡山棄之來浚都子實浚都人乃得居林慮出

疆必載質浮海或乘桴聖賢義有在并介遂殊途靜言  
復自咎九徵有不渝表閼築土室苑粲安一車六月擁  
裘卧異世真同符何當雲壑裏添我一茅廬

歌行

應制天馬歌

臣聞聖元水德正色在朔方物產雄偉馬最良川原飲  
齟幾萬萬不以數計以谷量承平雲布十二閑華山百  
草春風香又聞有駿在西極權奇倣儻鍾乾剛茂陵千

金不能致直以兵戈勞廣利當時紀述雖有歌侈心一  
啟何由制吾皇慎德邁前古不寶遠物物自至佛郎國  
在月窟西八尺真龍入維繫七逾大海四閱年灤京今  
日才朝天不煩翦拂光奪目正色呈瑞符吾玄鳳翥龍  
臆渴烏首四蹄玉後鑿其前九重喜見遠人格一時便  
勅良工傳玉鞭錦韉黃金勒瞬息殊恩備華飾天成異  
質難自藏志在君知不在物方今天下有道時絕塵詎  
敢稱其力臣才罷駕亦自知共服安輿無更軼



題友人所藏明妃圖

臂香骨沁守宮虐金鎖重門怨銀鑰深宮有眼不識春  
晝長時聽雲間樂平生所見惟監宮今朝豈期見畫工  
君王知畫不知妾薄命已分如秋蓬黃沙漫漫天無窮  
驚飈吹老紅芙蓉穹廬明日又何處此生遂負南歸鴻  
和親納侮號上策建議詒謀婁敬責妾身雖苦免主憂  
猶勝專寵亡人國關山寥落夢亦迷嫁雞正爾隨雞飛  
人間生女莫望貴只可近作田家妻琵琶聲斷霜天月

青塚至今青不歇後來却有蔡文姬千古胡笳辱哀拍  
行建德縣民有訴作橋罹害者作徒杠行

霜餘溪湍息奔鬪農隙維時梁可構往來恐有病涉人  
官著恒規誰敢後邑胥承帖來鄉里鄉民見胥如見鬼  
督材斬木到丘壘致期視成毆婦子人未安行力已疲  
冬無旨蓄雞先死田家雞盡誠可哀邑宰旦夕行橋來  
吁嗟此役本為利誰知為害翻百倍老癯僂僂訴且泣  
莫遣吏監民自力治貪問瘼乃吾事去甚痛懲尤所急

老癯又言官試聽今日所知百無一我聞此語憤填膺  
不可勝誅空太息安得落落寰區間盡是龔黃二千石

臨江見大船宏麗異甚賦賈客樂

鼓聲震蕩馮夷宮帆腹吞飽江天風長年望雲坐長嘯  
穩駕萬斛凌虛空主人揚州賣鹽叟重樓丹青照牕牖  
斗帳香凝畫閣深紅日滿江猶病酒錢塘女兒靜且姝  
臂金盈尺衣六銖憑闌飯飽觀戲魚清波照影紅芙蓉  
江城到處時彌楫徧買甘鮮窮所悅千里攜家任去留

一生為客無離別敦農抑商昧遠計遂使素封輕得意  
握籌狡獪俯承命危坐咄嗟收厚利田廬彫敝君知否  
終歲勤勞莫糊口夏稅未了秋稅來三十六策惟有走

喜逢口

灤陽驛東北四十里有雙塚世傳昔有久戍不歸者其  
父求之適相遇此山下相抱大笑喜極而死遂葬於是  
俗因謂之喜逢口亦猶望夫之有石也雖莫究其世代  
姓氏而其言有足感人者故作是以紀之

兒寒解衣重撫摩兒饑推食孰忍訶長成與國遠負戈  
一去不返當如何去時云戍東北鄙直出榆關度遼水  
白頭郎罷與影俱豈憚山川千萬里天教此地適相逢  
父曰從天墜吾子笑疲樂極俱殞身誰謂情鍾遽如此  
官家開邊方未已同生又別寧同死山雲漠漠風颼颼  
山頭雙塚知幾秋當時不忍一朝喜今日翻飛千載愁  
猶勝負女化為石終古孤身雙不得清江寒影日悠悠  
行人一去無消息

赤壁

孽瞞禍水劇趙女漢火餘光能幾許蜀方傳新噓未然  
吳偶束縕成一炬萬艘枯葦沃以膏空江如韞長風鼓  
九淵鼎沸羹魚龍連營熾炭騰貔虎雄圖南紀成畫餅  
匹馬華容作窮鼠坡翁乘興賦赤壁爛漫天機湧毫楮  
偶從雪裏寫芭蕉又似驪黃不毛舉考圖求故此其地  
疾惡千年若躬睹江山蕭條歲華晚興廢人間幾今古  
買魚沽酒弔阿瞞醉和漁歌短蓑舞

雷蓬歌贈廖楚材山長

人間塵土何地無道人自愛居江湖江湖佳處寫不盡  
且復想像陳其脩有舟如葉君勿笑氣象乃欲吞堪輿  
四時風景皆可樂歲晚獨與天游俱青山昨夜忽遁去  
萬象一色涵冰壺眼界疑墮清虛府心境直造鴻荒初  
道人箕踞受奇供但訝光怪生籊籊霜筠露籊政不俗  
更欲緣飾為瓊琚湘江清碧俯見底嶽麓倒影寒縈紆  
興來不省有物我短蓑獨速歌吳歛可憐翠被秦復陶

但鼓憂患來攻歐莫言雪盡蓬遂廢敲雨承月仍相娛

哀棄兒

雪霜載途風裂肌有兒鵲結行且啼問兒何事乃爾悲  
父母棄之前欲追木皮食盡歲又饑夫婦行乞甘流離  
負兒遠道力已疲勢難俱生灼可推與其寔尾莫我隨  
不如忍割從所之今夕曠野兒安歸明朝道殣非兒誰  
父兮母兮豈不慈天倫遽絕天實為卜年執政雖咸腓  
發廩有議常堅持昔聞而知今見之倉皇援手無所施



兒行不顧寒日西哭聲已遠猶依稀

偶閱可行書見其印章曰洹溪釣者戲為野語  
道士只合山中居釣者只合溪中漁不山不溪朝市趨  
人輕爾厭重爾誣彼道士者尤迂愚妄欲躋世為唐虞  
平生動為鬼揶揄况負且乘招而呼山耶溪耶盍歸歟  
山有美茹溪有魚

李惟中學士自西臺侍御召入以未央宮瓦硯  
為貺作此謝之

漢家作宮法紫微金鋪玉戶明華榱甄官陶瓦極能事  
鉛丹細擣咸陽泥一朝神雀去不返秋風禾黍驚離離  
谷陵且變此宜盡一二時出農夫犂人間購求作珍玩  
洗刷篆籀分毫釐西臺執法好事者磨磨為硯尤瑰奇  
體呈全璧徑尺許沼開新月才一眉堅如鐵石潤如玉  
墨聲瑟瑟松風吹惠然匣送感高義但惜所與非所宜  
公才真是謫仙裔善事利器方相資嗟予蕪學忝詞館  
雖有此器無能為世傳銅雀亦佳品搜剽黃壤今無遺

高皇垂統四百載老瞞何物敢等夷愛人屋上烏亦好  
況茲適用逾端溪楮生毛頴賀得友坐令几案增光輝  
代言揮制固多愧玉堂風月猶能詩

中書久病得請將歸吳閒閒大宗師亦有疾以  
其象為贈云代彼陪行焚香對之作此以謝

宵人本是山澤臞涉世政坐饑寒毆五年黃閣事何補  
種作老病叢孱軀灤京歸來十浹日藥裹不可離須臾  
平生結客半寰宇未免操瑟從齊等可人底事期不來

承慶堂深誰敢呼邇來亦復詩作崇清減益見風標孤  
杜門却掃難折簡豈意惠然來畫圖相看一笑但臆對  
妙契未許卮言斟清冰寒玉照林表和氣春風生座隅  
齋居頓覺俗氛遠高致已逼沈疴蘇我方歸思劇迅矢  
公自有分居方壺過從此去計必少夢中道路多縈紆  
便當卷奉江湖去願得始終如縻驢

小樓對閒閒宗師象因次舊韻寄之

鼎食不解肥我臞多病亦為山林毆巾車孤舟任所適

何往不可容微軀莫言五十未為老縱有七十來須臾  
今年兩耳得差勝飽聽萬籟吹笙等閒人多事迫詩債  
野老敗興時招呼小樓今日好風色目斷天末冥鴻孤  
一時幽興豈容負況對蓬島神仙圖篆烟凝坐共心賞  
盡醉更把空尊斟懷人未免有芥蒂處世已賞無廉隅  
分江小鼎煮粟粒誅茅別墅營屠蘇遠山但藉一枝杖  
中流誰辨千金壺菊籬秋香晚未減松牕月色寒相紆  
我行不武分斂迹安得甘草資蛩驢

圭塘小藁卷二

欽定四庫全書

圭塘小藁卷三

元 許有壬 撰

律詩

沙湖道中

城居如坐井出郭始知春  
草色纔翻燒禽聲便可人  
遠山來邏迤羸馬去逡巡  
喚醒三年夢東華足軟塵

田家對雪

野老能留客柴門便反關落梅點衣上飛雪墮杯間地  
僻偏宜竹牕幽更對山自憐真野逸瓶罄不知還

夜至魯港

桴鼓遠銅籠前驅列炬紅星芒寒拂地江影靜浮空聰  
語漁村近連航水驛通不才慚傳食鮭菜足為供

荻港早行

水國宜秋晚羈愁感歲華清霜醉楓葉淡月隱蘆花漲  
落高低路川平遠近沙炊烟青不斷山崦有人家



夜行潤陂

蕩蕩唐虞世區區虱蟻臣  
露餐烏攫肉夜渡馬知津  
危棧依山盡微行到水頻  
風霜儘蒙犯庶用答涓塵

神山雨

山中日日雨松竹早知秋  
清響自深夜逸人無遠愁  
牕虛聞葉落林暗見螢流  
對景因懷杜江村事事幽

登後山觀湖漲時陰雨忽霽

陰磴盤盤上枯藤得得來  
長楊半腰水老桂一身苔  
秋

氣蛩先覺風聲鶴欲回山雲自行雨休為老夫開

晚過韶州

世去重華遠名偕二石存溪寒清見底榕老亂垂根野  
色偏宜晚民居僅似村曲江人已矣楚些擬招魂

橫浦登舟

南征殊不惡樂事總相關馬上行思句舟中卧看山盡  
收烟景去滿載月明還何往不自得浩歌天地間

元統甲戌分臺上京飲馬酒而甘嘗為作詩丁

丑分省日長多暇因數土產可紀者尚多又賦九  
題并舊作為上京十詠云

馬酒

味似融甘露香疑釀醴泉新醅撞重白絕品挹清玄驥  
子饑無乳將軍醉卧壚祠官聞漢史鯨吸有今年

秋羊

塞上寒風起庖人急尚供戎鹽春玉碎肥羖壓花重肉  
淨燕支透膏凝琥珀濃年年神御殿頒餽每霑儂

黃羊

草美秋先膾沙平夜不藏解條文豹健鬻炙宰夫忙有  
肉須共世無魂亦似麋少年非好殺假爾試穿楊

黃鼠

北產推珍味南來怯陋容瓠肥宜不武人拱若為恭發  
掘憐禽獮招徠或水攻君毋急盤饌幸自不穿墉

粃麪

坡遠花全白霜輕實便黃杵頭麪退墨磴齒雪流香玉

葉翻盤薄銀絲出漏長元宵貯膏火蒸墨笑南鄉

南鄉  
麴

黑甚熟則堅實若瓦  
石可代陶蓋貯膏火

### 蘆菔

性質宜沙地栽培屬夏畦熟登甘似芋生薦脆如梨老  
病消凝滯奇功直品題故園長尺許青葉更堪齋

### 白菜

土羔新且嫩筐筥薦紛披可作青青飯仍攜玉版師清  
風牙頰響真味士夫知南土稱秋末投簪要及時

沙菌

牛羊膏潤足物產借英華帳脚駢遮地

此物喜生車帳卓歇之地夏秋

則環繞其迹而出

釘頭怒戴沙齋厨供玉食毳索出瓊車莫作

垂涎想家園有莫邪

地椒

凍雨催花紫輕風散野香刺沙尖葉細敷地亂條長楚  
客收成裊奚童擷滿筐行厨供草具調鼎爾非良

韭花

西風吹野韭花發滿沙陀  
氣校葷蔬媚功於肉食多濃  
香跨薑桂餘味及瓜茄我欲收其實歸山種澗阿

尋梅

何以慰吾衰梅花秀發時  
晚香傳遠樹春雪避南枝  
林靜來差早溪深行獨遲  
與君謀一醉及此未離披

水木清華亭宴集十四韻并序

水木清華亭侍御史王公公儼別墅也位都城巽隅出  
文明門餘里許園池構築甲諸邸第予客京有年識公

儼亦久而未嘗迹其地至正乙未春自汴召入俄公儼  
由遼省拜中臺握手傾倒屢約宴集塵冗不果致期宿  
具復有意外之撓乃七月二十又三日始遂盍簪左轄  
呂仲實中執法杜德常右司王本中左司尚彥文實同  
尊俎酒旨樂備物腆意勤適雨霽秋清塵空地迴庭木  
湧翠渚蓮散紅北瞻闔闔五雲杳靄極目西望舳艫汎  
汎於烟波浩渺雲樹參差之間蕭然有江鄉之趣不知  
其為轂擊肩摩之境也煩襟滯慮滌濯淨盡茲遊奇絕



宜造物之不輕畀也公儼請曰人生四美百年幾遇不可不紀也乃即水木清華亭為韻賦詩有壬分華字其詩曰

世祿推門閥天墀幾拜嘉高情忘勢利大隱謝紛譁朝市塵無染蓬瀛路豈賒眷言營別墅初不遠東華畫舸堂前過青帘柳外斜晴紅迷菡萏寒翠接蘼葭揮麈風生座扶筇雨壓沙萍開輕泛鴨荷側重擎蛙只訝神仙府誰知宰相家賓朋玄圃玉文采赤城霞麗曲凝雲表

仙粧炫水涯添栽三徑竹遞賞四時花心事尊中物人  
生海上槎相逢須盡興明日各趨衙

送馬明初教授南歸一十韻并序

後至元戊寅予得請歸江夏別業明年冬遊長沙又明  
年二月安仁馬君明初來見於琅璫山其人溫醇其文  
粹精傾蓋如平生同遊南嶽更唱迭和遂同歸江夏甫  
七日復參知政事命下以小兒累之又同北馬至任城  
明初舟覆幾不免間關跋涉不忍予棄用中臺翰林薦

堂除緱山書院山長及松擢右衛率府教授始釋褐衛  
官若胥卒皆國人明初請收書教其子弟為華學官屬  
黷之鳩俸檄明初買書江南因得歸省其家焉過予相  
下將別請言吁世俗之交翻覆雲雨况延之館塾者其  
為交不又密乎饗飧之不精不時也供侍之不慎不及  
也脯脩之不腆也汲引之不酬也為主入者有能不犯  
於是者乎人情久則狎狎則慢慢則隙生焉賓主至是  
不失歡者鮮矣而明初與予十年如一日始終無間言

有德君子哉述其槩為詩以餞之其詩曰

吾子昔傾蓋琅璆古渡頭袖文驚蜀錦懷寶重天心  
既同金斷膠因向漆投有邀須共往無倡不為酬南嶽  
朝聯轡湘江暮艤舟展窮峯頂寺詩滿水邊樓訪古由  
來喜尋芳到處留遂移衡浦隱便作武昌遊坐席何曾  
暖招旌遽見求高情安旅次遐躅又神州道路多嘗險  
山川只薦愁掃雲髭免頽簷雪敝貂裘善誘兒何幸深  
藏價未收忽看鴻鵠舉甘效蜚蛩休洹水寒偏瑩林慮

晚更幽誰知三仕已相累十春秋公道先揚善真才自  
拔尤恩袍明翡翠教鐸振寰貅行役仍清淡言歸遽阻  
修臨歧惟一語音信莫悠悠

壽李秋谷平章

黃鍾噓暝挽春留綠蟻浮香帶月芻宰相得閒纔是貴  
人生有子更何求家傳大字五千卷身在神仙十二樓  
記取年年好風景雪松霜檜豈容秋

送黃文復歸長沙

半生湖海夢依稀但誦湘南遠寄詩先友凋殘公獨健  
故園荒盡我方歸百年未滿常憂畏千里相逢又別離  
他日瓊江松下路西州難似此沾衣

橫山有高竹樓別業留信宿始歸

酒香牲腍主人歸正是猿驚鶴怨時梅影小池春入畫  
竹聲虛閣夜催詩世間真樂無多事身外浮名只費辭  
他日結茆容我隱一章先當買山貲

九日陪闔臺諸公登石頭城

一江環抱四山圍  
酬節追歡剩費詩  
鴈影不移雲盡處  
秋光都在雨晴時  
當年玉樹人何在  
明日黃花蝶豈知  
便駐高軒拚醉倒  
絕勝無酒繞東籬

題昌平劉建議祠

一卷春秋兩鬢皤  
丹誠貫日口懸河  
策能匡世時不用  
天實厭唐人奈何  
自古大材多薄命  
而今我輩亦登科  
可憐熏腐俱塵土  
得似高名永不磨

遊昌平憩縣學歸過朱都督碑

木葉才霜水不波偷閒今日遂婆婆  
婆清秋林壑斜陽好  
豐歲郊原樂事多秦塞已隳仍郡縣  
武城雖小有弦歌  
却憐一片朱家石千古涇原臭不磨

神山即事

京塵汨沒已華顛恰是山居第一年  
松月照牕詩入聖  
竹風吹榻夢遊仙  
隨人久作悠悠者  
處世方知綽綽然  
尚愧未能忘口腹  
時勞昆季致肥鮮

和謝敬德學士見寄韻二首



平生疎懶是天姿  
今歲春來起亦遲  
好酒或如陶靖節  
杜門深愧鄭當時  
向來事業惟供笑  
如此風光忍廢詩  
館閣真才試枚舉  
鵠山陪預恐難期

淡靄輕風弄野姿  
江天寥廓鳥飛遲  
從知宇宙多閒地  
誰信襟懷勝舊時  
夜雨不驚逋客夢  
暮雲猶入故人詩  
山中亦有陽春曲  
拂拭朱絃待子期

登岳陽樓

平生輪奐壯巴丘  
消得騷人一繫舟  
雲氣遠攜湘雨至

湖光寒入蜀江流山川信美非吾土天地無窮有此樓  
三十四年如夢過可憐華髮賦重遊

黃陵廟

黃陵廟下草萋萋水遠山長聽竹枝末路不求同死處  
重華寧有再來時霜筠苦淚留千古楚樹愁雲接九疑  
珍重韓公修廢墜却憐傲福類神私

過湘潭

江邊楊柳翠縈回柳外人家罨畫開一夜東風花落盡

千年華表鶴歸來暮雲山出遠浮黛春雨水添濃潑醅  
莫嫌扁舟訪陳迹白頭懷抱易生哀

祝融峯與廷鎮觴詠有懷歐陽原功蓋嘗約同  
遊而予不能待其歸也

載酒窮躋最上峯嘯歌聲撼海濤風得陪五馬二千石  
獨少三生六一翁為問北門紅日下何如南嶽白雲中  
寄詩幾欲申前約無奈人生似燕鴻

時雨忽降簿書甚稀獨坐王可矩右司有詩次

其韻

翠樾雲深百鳥鳴  
彤闈如水嫩涼生  
雨聲自與詩有約  
天巧豈容人強名  
萬里秋風黃鵠夢  
五湖春水白鷗盟  
年來不用愁華髮  
尚有觀山老眼明

西廳東閣總詩鳴  
天籟相關觸處生  
京國故人多老病  
洛陽才子獨聲名  
風雲幸際文昌運  
松柏休忘歲晚盟  
他日江湖攜手去  
儘渠蚊睫有焦明

題武衛段指揮書林

相府深沈書若林牙籤插架列森森千枝萬葉本根在  
二帝三王雨露深樞翳斯文功利學棟梁來世聖賢心  
經殘百氏紛紜出慎勿輕棲惡木陰

閒居雜詩四首

鬢髮蒼浪齒動搖自知宜退待誰招茶餘引鶴消春晝  
酒醒聞雞記早朝肥截玉肪羹縮項香翻雲子飯長腰  
尚嫌門有徵詩客時與山人破寂寥

半山雲樹接修篁鎮日無塵到草堂  
窺牖風來書葉亂

膽瓶花落硯池香  
壺觴自酌教微醉  
松菊猶存及未荒  
護果灌園常不暇  
誰知閒裏更多忙

鵲山東北接郊墟  
郭影嵐光畫不如  
九十日春朝暮雨  
兩三間屋古今書  
庭花紅礙經行處  
園竹青回剪伐餘  
滿地蒼苔愁踏破  
年來深喜故人疎

竊祿多慙號具臣  
歸田何幸作閒人  
登山臨水今非客  
病酒愁花又過春  
夢斷紫霄黃閣遠  
眼明青鏡白頭新  
芥臺竹笋來相續  
不道茅柴味更真

和傅汝礪寄來韻二首

江水舟航日夜東故人音問得常通  
君才能挽千鈞重我老惟懷一畝宮  
自古山林容小隱只今臺省有諸公  
欲知別後詩成處都在花香竹影中

春紅園圃眩西東花下縈紆一逕通  
不向雷門操布鼓要從人海見珠宮  
多言浪負三千牘老夢都忘十八公  
珍重吾宗有成訓人間何似在山中

圭塘小藁卷三



欽定四庫全書

圭塘小藁卷四

元 許有壬 撰

絕句

題西域木唐卿旌表孝義卷

橋梓天殊棣有華  
良心初不間幽遐  
何年四海無旌表  
盡化忠臣孝子家

琳宮詞次安南王韻

二首

涼入簾幃夜色輕  
瑤臺添月更虛明  
一壺天地渾無迹  
只有清風動竹聲

山中活計只餐霞  
世事茫茫日自斜  
謫到玉堂無好況  
夜深猶草侍中麻

織錦迴文圖

明珠金縷爛縈回  
香玉連環剪不開  
不把肺肝都織出  
將軍惟識趙陽臺

杜子美象

刪後騷餘代有聞集成惟許杜陵人憑誰寄語沿流者  
流到江西不是春

賞心亭

賞心亭上雙栢樹看我往來今十年栢樹青青宛如昔  
當時游子已華顛

牛背觀書圖

蒲羈盤膝勝安輿人訝形骸與世疎却笑徙居三十乘  
恰如牛背一編書

畫馬

惆悵孫陽世久無紛紛駑驥遂齊驅不教神物俱湮滅  
猶幸人間有畫圖

丙吉問牛圖

肥充列鼎健充車厚養專為簿領毆千古清風梓人傳  
憑誰書繼丙家圖

和康里子山韻

洞深春早透蘭芽牕曉雲香亂海霞萬丈紅塵飛不到

紫簫吹綻碧桃花

李陵臺

李陵臺下駐分臺  
紅藥金蓮徧地開  
斜日一鞭三十里  
北山飛雨逐人來

上都歸口號

嬌兒幼女逐山妻  
爭解行囊看賜衣  
顛倒海圖裨短褐  
可憐杜老北征歸

信筆

造物知余素愛山一官故調萬山間山深民朴官無事  
却為觀山日不閒

冬夜即事

紙牕鋪月白溶溶爐火欺燈照室紅萬籟聲沈人語定  
好詩都在杳冥中

行縣書所見

漲潦留泥糞稻畦石渠分水灌麻池醉翁社散忘歸路  
行過柴門尚不知

謝祐之桃花折枝

天台不折一枝歸  
晴日明牕有所思  
流水亂山迷去路  
案圖無語立多時

令狐學士金蓮圖

九天光彩動金閨  
輦路風香樹影齊  
却笑漢家恩數薄  
只教天祿待青藜

神山雜詩二首

山留殘雨濕拖雲  
竹引鮮飈細灑人  
詩思清如寒水玉

休教落紙恐沾塵

牕扉九夏鎮長開一榻無塵地有苔怪底山禽棲不穩  
竹林風雨送涼來

次黎東山鳳棲別墅韻

風漪翠舞躬耕稻雲錦紅酣手種花策杖尋君迷不得  
有書聲處是君家

七里原頭營別業三間堂下有東籬霜林不盡天如洗  
都是山人未了詩



都門柳

都門四十里青青幾度迎人幾送行老子有言來致柳  
只煩相送莫相迎

書所見 二首

陵坡野菜綠如鋪膚受方期宥老榆菜少人多挑已盡  
有榆從此盡無膚

田園賣盡及兒孫少壯流移老病存一段升平好圖畫  
人間惟欠鄭監門

夜次館陶 二首

三老趨程不憚勞  
船頭坐看月輪高  
烟村漁火微茫外  
一簇人家是館陶

浦雲林霧鬱蒼蒼  
水面無風晚自涼  
今夜蓬牕應不寐  
計程三百是吾鄉

林慮南樓

西山為我曉烟開  
正爾瘡鍾造物哀  
更欲細看陰嶺霧  
老龍將雨出山來

題龍甫耕雲堂

滿山深鎖白英英，不解為霖但可耕。  
只恐無心忽飛去，楚人何處望秋成。

董仲達送予至湘陰別後順風比晚行三百里，  
然有懷作二絕付其僕之遠送者持歸。

吾子才華我最知，鬢毛回首各成絲。  
汨羅江上一杯酒，萍水相逢又幾時。

江離杜若滿汀洲，騷國春來亦可愁。  
一日順風三百里，

故人何處望予舟

即事二首

幾家門繫釣魚船  
一陣風香燎麥烟  
畫出太平村落景  
酒旗多在綠楊邊

遠浦客帆明冉冉  
前村牧笛響嗚嗚  
園桑葉盡蠶成繭  
庭樹陰濃燕引雛

春日漫述

竹几蒲團嬾最宜  
不知花影隔牕移  
鄰翁忽報小甕熟

老子坐忘成坐馳

卧龍圖

能辨人間大有年  
九淵誰遣抱珠眠  
等閒莫似隆中起  
雨得西南最爾天

蘇彥良西塾堂

蒼苔滿徑樹連村  
中有幽人屐齒痕  
此去客來宜定約  
無詩無酒不開門

主塘小蒙卷四

欽定四庫全書

圭塘小藁卷五

元 許有壬 撰

序

文丞相傳序

宋養士三百年得人之盛軼唐漢而過之遠矣盛時忠  
賢雜還人有餘力及天命已去人心已離有挺然獨出  
於百萬億生民之上而欲舉其已墜續其已絕使一時

天下之人後乎百世之下洞知君臣大義之不可廢人心天理之未嘗泯其有功於名教為何如哉丞相文公少年趨厲有經濟之志中為賈渚徊翔外僚其以兵入援也大事去矣其付以鈞軸也降表具矣其往而議和也冀萬一有濟耳平生定力萬變不渝父母有疾雖不可為無不用藥之理公之語公之心也是以當死不死可為即為逸于淮振于海真不可為矣則惟有死爾可死矣而又不死非有他也等一死爾昔則在己今則在



天一旦就義視如歸焉光明俊偉俯視一世顧膚敏裸將之士不知為何物也推此志也雖與嵩華爭高可也宋之亡守節不屈者有之而未有有為若公者事固不可以成敗論也然則收宋三百年養士之功者公一人爾孫富為湖廣省檢校官始出遼陽儒學副提舉廬陵劉岳申所為傳將刻之梓俾有壬序之有壬早讀吟嘯集指南錄見公自述甚明三十年前遊京師故老能言公者尚多而訝其傳之未見於世也伏讀感慨惜京師

故老之不及見也公之事業在天地間炳如日星自不容泯而史之取信世之取法則有待於是焉若富也可謂能後者已

五峯文集序

五峯胡先生文集凡五卷南軒張先生序之矣益陽劉用孚將刻諸家塾且徵予題其端予惟世之深知者莫若師友先生之集南軒之序詳矣予何人哉然其引而不發者愚不容詗也先生資質純粹根乎天性講貫精

密得之家傳於六經則沈潛反覆取道之原於百家參  
考互訂必是之歸其涵養見於知言一書而性命道德  
之微無不貫其設施著於皇王大紀而禮樂刑政之用  
無不該議論慷慨輝光宣著千載之下猶想見其風采  
至於發言為詩抒言為文皆修齊治平之實也先生避  
地衡山結廬五峯故嘗造祝融之峯以求先生之遺蹟  
而深山大谷雲烟草樹邈乎其不可求也獨取先生之  
書伏而讀之其亦萬一私淑者乎用乎刻其書俾大行

諸世其用心亦仁矣哉

大一統志序

至元二十三年歲丙戌江南平而四海一者十年矣集  
賢大學士中奉大夫行秘書監事扎瑪拉迪音方今尺  
地一民盡入版籍宜為書以明一統世皇嘉納命札馬  
刺丁洎奉直大夫秘書少監虞應龍等蒐輯為志二十  
八年辛卯書成凡七百五十五卷名大一統志藏之秘  
府應龍謂比前代地里書似為詳備然得失是非安敢

自斷尚欲網羅遺逸證其同異焉至正六年歲又丙戌  
十二月二十一日中書右丞相巴爾奇爾布哈率省臣奏  
是書國用尤切恐久湮失請刻印以永于世制可明年  
丁亥二月十七日皇上御興聖便殿中書平章政事特  
穆達實傳旨命臣有壬序其首臣聞春秋所以大一  
統者六合同風九州共貫也然三代而下統之一者可  
考焉漢拓地雖遠而攻取有正譎叛服有通塞况師異  
道人異論百家殊方指意不同亡以持一統議者病之

唐腹心地為異域而不能一者動數十年若夫宋之畫于白溝金之局于中土又無以議為也我元四極之遠載籍之所未聞振古之所未屬者莫不渙其羣而混于一則是古之一統皆名浮於實而我實協於名矣且統之為言昉見於易乾之彖曰大哉乾元萬物資始乃統天說者謂天也者形也統也者用形者也象曰天行健君子以自强不息則又示人以體乾之道蓋天為萬物之祖君為萬邦之宗乾以至健而為萬物始乃能統理

於天皇上體乾行健以統理萬邦所謂一統萬類可以  
執一御而六合同風九州共貫之機括繫焉九州之志  
謂之九丘周官小史掌邦國之志外史掌四方之志志  
之由來尚矣况一統之盛跨軼漢唐者乎是書之行非  
以資口耳博洽也垂之萬世知祖宗創業之艱難播之  
臣庶知生長一統之世邦有道穀各盡其職於變時雍  
各盡其力上下相維以持一統我國家無疆之休豈特  
萬世而已哉統天而與天悠久矣

綱目書法序

朱子感興詩躡舉三朝而不他及其有激於歐馬而綱目之所以作也周不綱非一日至命三家為諸侯則其綱不復可振矣此一家託始之命意也晉史帝魏習鑿齒已病之唐書紀武則范氏之論至矣通鑑千三百六十二年事如指諸掌偉哉書乎其文則猶史也朱子慨然本春秋之旨任筆削之重主正統以明君臣之分嚴書法以誅亂賊之心其取義大矣永新劉益友先生作



書法發明之其徒進士湖廣省照磨馮君敬修欲其說  
褻於世俾抒其槩噫朱子之心憂世甚至非矛盾溫公  
者也民彝物則之所係則因革生焉諸侯僭王則貶稱  
君無正統則並書不相下帝昭烈以明正統書在房陵  
以合乾侯死揚雄之仕莽卒陶潛而係晉皆凜乎斧鉞  
其筆而君臣之大義明矣他如與義徵旨益友之撤覆  
發韞殆無餘焉若夫開卷之初命三家率舊文者終卷  
非一義苟至當吾何異焉蓋綱目成讀通鑑者有所折

衷而亂臣賊子無所逃罪矣二書可相有而不可相無者也益友之書適而不牽會而不撻智周於理而力周於文矣或謂孔子作春秋三傳且相異同朱子學孔子者益友書法果盡合朱子之心乎予曰朱子之書主褒貶其心易知也昔之書今之削昔之遺今之特書揆之以始末律之以凡例舉此以見彼寓微而示顯者益友之綜覈精矣竊嘗一二致疑沈潛反覆祇見目力心思之不逮而足之所未至固未易悉其地之所有也然則

書法一書抑綱目之不可無者乎後之人有如左氏公穀者操戈而出則非區區之所及知也

秋谷文集序

相國李韓公秋谷先生薨之二十七年子獻由參議中書省事拜治書侍御史進侍御史有壬寅中丞一日出先生文集俾序其端昔蘇子瞻恨不及一見范文正公與其季子德儒同官于徐序文正遺藁以挂名文字中自托門下士之末為幸而有壬之擢第也先生實座主

接餘光親誨益不少視子瞻之於范文正則有壬之幸  
多矣序其敢辭先生以雄邃之學為帝者師功勲在王  
室聲名滿天下自九重以至於里巷皆以字稱才氣跌  
宕落筆縱橫歌詩流播荒陬下邑傳郵逆旅往往大書  
於壁然世之歌詩而不知其文知其文而墓碑未出不  
知其功勲之大之詳也國初因仍吏治日就偷窳士氣  
奄奄僅屬先生在潛邸日久啟沃謂儒可與守成一旦  
當國即行貢舉蓋倡於草昧條於至元議於大德沮尼

百端而始成於延祐亦戛戛乎其艱哉三十年来得人  
之列於庶位者可枚指也士風之隆替治化之樞紐在  
焉大德之末丁國勢危疑神器杌隉之會猶操舟滌瀕  
三峡遇排山倒海之風而能力贊祕策卒底平濟非社  
稷之臣乎若夫名爵掃地而削其尤錫予空帑而復其  
舊太官恃不鉤檢而覈其濫宿衛依憑城社而沃其冗  
貴近世臣莫敢議及乃挺身任之灼知將來之危不恤  
也國家用儒者為政至元而後炳炳有立者先生一人

而已有壬因襮其槩使讀是集者知有德有言且以見  
功勲之出有原柢也皇上追念勲德贈舊學同德翊戴  
輔治功臣太保儀同三司上柱國追封魏國公諡文忠  
獻字伯徵世濟其美詎可量也哉

特進大宗師閒閒吳公挽詩序

至正六年十月七日特進上卿玄教大宗師閒閒吳公  
薨於大都崇真萬壽宮承慶堂中朝士駢沓走弔莫不  
哀傷士哀傷之不足又形諸歌辭諸弟子哀為卷軸徵

序其首以倡嗣音以廣其哀焉有壬交游三十年昔在  
政府嘗奉勅贊公像有人以為仙我以為儒之語士論  
不謂過也得請歸公遺雲林小影曰我不能去以我像  
行是從公于邁也今年四月赴翰林學士召甫入京公  
即率其徒治具相勞旅館中既陞見將歸造承慶堂不  
告以故但酒至為引滿公曰快意若是豈欲去而留別  
耶有壬明日遂行閏十月再赴承旨召至京則公已殯  
於嶽祠之光岳堂矣嗚呼惜哉公年十三學道十六已

拔萃班行其師神德真君受世皇殊眷江南初定有事  
南嶽公以大弟子選行神德代祠嶽瀆公實輔行年二  
十三聲望赫赫矣始授冲素崇道法師南嶽提點加號  
玄德改大都崇真萬壽宮提點拜玄教嗣師總攝江淮  
荆襄等處道教都提點神德觀化制拜公特進上卿崇  
真弘道玄德廣化真人總攝江淮荆襄等處道教知集  
賢院道教事玄教大宗師皇帝即位親御翰墨書閒閒  
看雲四大字以賜年益高體日健勝目障而復明恭迓



龍虎臺歸歷造故舊戒其徒番次肆設飲必盡歡坐是  
得疾越八日中夜命弟子焚香中庭更衣正寢端然而  
逝壽七十有八平生勇於為善不以外方自疑故凡政  
令之得失人才之當否生民之利病陰有以裨益於時  
者人不知也與人交終始不渝至其子孫猶周恤之平  
居宴坐扣以國初事歷歷覲縷世家源派隆替顛末按  
譜敷陳有不及者經久覆扣一語不爽二親之存屢歸  
為壽其沒也得請襄事以能喪聞疏封贈諡備極恩榮

夫神仙之事不得而知吾儒聞之以其亂大倫也若公  
事君而忠事親而孝謂之亂倫可乎壽傳八旬脩然而  
返冥漠與造物者為徒視無益於世白日輕舉而稱神  
仙者世未必有能知其孰是孰非者已其生質之異際  
遇之隆言之實則有侍講虞公道行述方將銘堅珉  
登太史何事於序諸弟子奉冠劍歸葬有日請益切故  
為述三十年之契以寫不能自己之情而與其出處之  
槩以導紼謳斥苦之和者焉

張文忠公年譜序

贈平章政事濱國文忠張公薨南臺中丞張起巖銘其  
碑翰林學士歐陽玄序其文江浙儒學提舉黃潛記其  
祠三君洎有壬皆延祐乙卯公主文所取進士也有壬  
辱知尤深公之薨乃不獲致一奠之哀獨欲效片言隻  
字以答知遇而奔走睽阻又不獲陪三君之列竊有憾  
焉公之子秘書郎引奉公年譜俾序其端嗚呼此有壬  
之志也公文行履歷具諸碑而槩諸譜矣請以躬承一

二言之公汲引後進如不及有壬初倅遼州偶免瘵曠  
書來獎勵有興斯文復古治語承乏中朝公在鄉里每  
小有著作達左右必喜而形之書蓋欲策其未至也尤  
慎許可獨稱緱山陳公曰邇來士大夫宜亟法此老蓋  
取其立朝蹇諤進退明決有契於心以矯時弊也朋游  
有為御史過於自保者公曰御史士大夫之洛陽也此  
而無聞無官可為矣拜詹事丞有壬迓之通州坐漕廳  
語終日其略曰予見舉人以書攫官旋擲其書以官裕

身而尋敗其官多矣子將不釋於用其勉之翼日入城  
則飄然歸矣自是不復一接焉公以布衣入京歷登樞  
要道不合即去優游山水若將終身關中之饑人死殆  
盡而臺中丞之命一下慨然登車傾已財竭心思活垂  
死無算號慟感疾以薨發於至誠有不能自己者非勉  
強所能也或議其蒞事太迫而疑其制行過高不知義  
之所在皆當為者也國家百年培養士類其學固足以  
支梧世用至於養其氣以勵其風節則若有未至者焉

風節不勵而不徇於富貴者鮮矣惟豪傑之士挺然有見於世而頑廉懦立之機係焉若公可謂豪傑之士矣而其久退一出又有合於義之大者也嗚呼其可尚也哉

忍經序

衡陽高士棲碧羅巨海嘗從文山海上歸終身宋衣冠交接稱許尤不苟有壬讀書衡泮居與之鄰乃辱與進聞其稱海北道廉訪使榕寓孫公之賢不容口蓋公往

來過衡衡士大夫多慕而見之巨海則交處最密者有  
送行序若詩在樓碧文集今尚能記其槩公金源烏古  
部人征宋有功歷官所至皆有惠政長憲海北民懷吏  
畏太夫人年高上疏歸養沂沿湖湘士大夫無不熟公  
者今中書左丞大司農良楨榦卿其子也時望所屬公  
累贈推忠靖遠著節功臣榮祿大夫中書平章政事柱  
國追封魏國正憲公某不及拜下風猶欲識其子孫以  
酬平日景行先哲之意而榦卿仕早有聲日踐華要承

乏政府實嘗同寅都城僦屋又得為鄰一日出書曰忍  
經以示某曰先子平生有得於此輯而為書乎其序之  
某識榦卿但知其世有積德而不知其所得之源也及  
讀是書為之三歎曰孫氏子孫之賢閥閱之大豈徒然  
哉公之言忍有正義有變義有衍義使人人有見乎此  
則修身齊家涖官之道盡在是矣夫以刃加心上而能  
受之非易事也易之懲忿窒慾書之以禮制心乃其下  
手要法公皆舉以示人自傳記子史以至佛書道書百



家雜著詩賦凡有關於忍經者靡不收入古今之言忍  
者無以復加矣幹卿既參大政尋拜左丞分省外藩復  
入政府廟堂以其久勞幾務聽辭中書俾專明農士論  
猶未釋也讀父之書得效若此不惟一身一家又將傳  
之天下後世也某賦性褊躁仕途五十年濱於危殆者  
屢矣使早得伏讀此書庶不至若是之殆也雖然衛武  
公年九十有五尚求箴警於國某雖七十有一苟未死  
一日有一日之事此書尚有資焉

國朝名臣事略序

聖元基朔方立人極世祖皇帝混破裂而一之廣輪疆  
理古職方所未半其天地之再初乎渾淪所鍾命世卓  
絕之才實輩出輔成之故盛德大業之所著自顓穹生  
民未之有也然而百餘年來元勲偉績世未盡白故老  
知者湮沒無幾家乘志銘不能家至而徧知也仁皇御  
極勅太史傳功臣而玉堂秘奧世莫得而見焉監察御  
史趙郡蘇天爵伯修輯國朝名臣事略十五卷湖北憲

刻諸梓徵序其端某在京師早知伯修之才而未知其  
有是編也惟其培學上庠歷史屬久故考之也詳擇之  
也審其類例倣朱子言行錄條有徵據略而悉豐而核  
其四方之爭先快覩者乎竊惟國朝真才雲集是編才  
四十七人有齊民知名而未錄者蓋朱子例嗣有所得  
當續書之也若是則四方之快覩者不一伯修之學其  
益昌矣又不知今士大夫用心如伯修者幾人世所望  
於太史氏出於事略之外者其將有所屬乎憲長篤禮

質班幕府李穀王大有職風紀育人材俾觀者率作是亦韓子所謂牽聯得書者也

宋誠夫文集序

延祐己未贈翰林直學士諡正獻宋公誠夫偕其弟顯夫始入京過予陋巷一見如平生所著曰千樹栗者視予曰京師吾鄉田廬盡廢江湖二十年儲蓄歸為恒產獨此爾閱其帙知其學已充文已成謂之曰君之產不但與千戶侯等將與萬戶侯等承乏山北幕歲辛酉當

大比時語同官第一人必在誠夫已而果然為御史為  
左司都事皆與予同事當大廷論議不顧忌絕去儒生  
拘迂懦訥氣習若老於吏牘者仕至國子祭酒而病尋  
卒於位既葬顯夫出所為詩文監察御史上之臺臺檄  
山南憲下所部刻之梓而俾予序其端夫士之生世生  
有聞於時沒有垂於後是不死矣而士之垂世者未可  
必其必傳而不與草木俱腐也至於誠夫之文則吾知  
其必傳焉待罪中書每館閣掄材未嘗不為誠夫歔歔

使天昌以年則其長翰林集賢亦猶昔之意其魁天下也不幸用之未能盡其才而幸得顯夫為之弟使其文著於世傳於後又類所刪文若樂府為別集片言隻字無所遺逸顯夫可謂能弟誠夫可謂不死矣誠夫自選其文更千樹栗曰至治集其傳不待予叙也獨列其守官梗概使讀其文者知其政事之長而信其見之文者非空言也顯夫今監察御史文如其兄二宋之名於是益著矣

春秋集義序

春秋由三傳而下世之存者可考也范氏探經而為集  
解啖趙考三家短長為統例伊川以傳考經之事跡以  
經別傳之真偽皆號精當而世之讀者無幾及胡氏傳  
出學者翕然宗之聖朝設科遂與三傳並用諸家之說  
幾無聞焉向會試以五經發策至有不知名家名氏者  
况有考其短長而折衷為書者乎且聖人之意當時門  
人有所不知世傳左氏時代不一要非親受於聖人者

宜其辭勝而失誣也公羊穀梁傳聞逾遠諸家之說各尊所聞其能盡合聖人之意乎朱子謂春秋大旨誅亂臣討賊子內中國外夷狄貴王賤伯而已未必如先儒所言字字有義也如此則傳註之說可泥於一偏乎豫章張君立擇諸家之論或全或略疏於三傳胡氏之後名曰集義擷衆長萃於一歷歷精至觀其自序蓋欲學者因是以求諸家之全戒其厭煩務簡而取足於此則君立所得與夫所以教人者可見矣欲觀君立之集義



當先觀君立之自序徧取諸家優游涵泳交暢旁通一  
旦有得自知去取迴觀集義心目瞭然與聞人之說襲  
而取之者異矣康節云春秋盡性之書也傳註而已乎

### 春秋經說序

予投劾歸田里客傳至御史張君約中章疏言三大逆  
當門誅洎諸姦惡族黨宜鐫削投諸遠且言天怒人怨  
驗古質今紀綱賞罰治亂所係言極剴切予讀而壯之  
億其人必知春秋者也春秋明天理正人倫語其大則

為亂臣賊子而作也約中元統癸酉進士治劇縣有聲  
入薦華貫難進易退歸卧林慮擢開州尹迫命興疾而  
赴予熟其賢未知其蘊既觀論列且寄所輯春秋經說  
徵序於是知其深於春秋而復自喜昔者億之之中也  
董氏言為人臣者不可不知春秋然春秋豈易言哉三  
傳而下便到啖趙啖趙而下不知幾家胡氏之專精而  
改元即位之說不能免龜山支離之議賈霜不殺之記  
不能辨法家假託之文則窮是經者亦戛戛乎其難哉

朱子不能自信於心未嘗敢措一辭者豈以是耶然其  
言曰春秋大旨誅亂臣討賊子貴王賤伯而已未必如  
先儒所言字字有義又曰聖經本平易後儒以己見論  
經故經義不白而反艱險即是究之朱子於經不既淵  
矣乎尹和靖言王安石廢春秋非其意以三傳不足信  
其不解者以其難也以其難而不解可也以其難而廢  
之則王氏心術可見我朝草廬吳公采撫諸家之言各  
麗於經分所異合所同為纂言十二卷又倣陸氏纂例

為總例七篇有功於經者也約中因纂言錄其說以附於經其自得者又疏其說於先儒之後中大路而不岐汭正流而不沱又有功於吳公者也有功於吳公斯有功於經矣一旦大用持是說以裁割庶事有什伯章疏者已經說豈空言而已哉

琴泉先生詩序

漢陽文學掾湘瀏劉嘽光遠氣豪而溫學充而貞與之游知若人游之久知若翁翁字山甫蓋今之隱君子也

昔長沙趙公平遠典刑一時尤相厚善家貧有襟量士大夫過者無不款接藏書教子掃絕塵俗惟癖於琴平遠號之為琴泉先生其有得於琴乎古者成人以樂養其情性而蕩其邪穢今則無矣鄭衛嘈雜萬耳一聲聲之平者獨琴近之故嵇康嘗謂衆樂之中琴德最優幽人高士養心理性舉有託焉平遠多藝尤精於是度曲審材斲削漆絲悉身為之顧挈是號而被之則其能可知已天下之水泉為勝水之原也海雖大受外所需非

其自出也今夫發而涓涓流而滔滔微而為溝池瀦而為江湖以輸於海而無窮皆吾之所自出取於內而不求於外者也而其為水也猶雨之始隕自天潔而不污者也易象蒙中庸時出孟子之有本皆有所取琴則何取焉豈以其始達也歷澗谷觸崖石潄然鏘然幽響振越和之以清風亂之以松聲山空聞聞其有契於吾琴乎抑絲木為聲假於人以發者也泉自然者也愛而不可挈也寓諸器而寫之泠然流出於絃徽間彼有無窮

之流此有無窮之聲聲與心會物我兩忘不知琴之為  
泉乎泉之為琴乎山甫之為琴泉乎琴泉之為山甫乎  
吾聞其人淡無所好豈屑屑於藝者寓意自適以發其  
胸中之樂爾年今七十二飲食起居如少壯時其又有  
得於琴之外者乎予以平遠之交知其友之端以光遠  
之子知其父之賢故喜為序之

智子元越南行藁序

鎮陽智熙善子元以多學濟卓犖之才大德間宿衛春

宮冀速化行其志命與時左為南臺行人轉掾史又不  
樂棄去今太師秦王右丞相為南臺大夫知其才居中  
書擢西曹掾皇上即位故事遣使頒朔安南行者超三  
級歸不駁降故自售雜還而薦私者亦復沸騰久不決  
乃合議堂上丞相曰智子元可欲行者與智面校優劣  
衆口始塞於是子元以禮部郎中佩金符為介使以行  
既反命出紀行詩藁徵言表之禮諸侯即位小國朝之  
大國聘焉况天子即位乎諸侯之於天子比年一小聘



三年一大聘五年一朝況蠻夷小國乎安南先宋納款  
我不拒之天下既一彼復反覆我不銜之褒嘉錫賚不  
吝也然自世皇時召其主入朝而為辭幾易世矣世一  
來王且不能行而朝廷每勤行人涵容煦育祇以見我  
元之天地其量也觀子元詩其處之之道大較已見矣  
今年五月二十五日檢才大安閣下予首舉子元甚力  
丞相喜且云智子元佛法亦通宜亟用之而下坐他有  
論薦可否持久俄丞相起遂輟凡使安南即酬美官子

元獨留滯餘一年雖然丞相不忘也一旦柄用其亦自行其詩乎讀之竟序而歸之

張雄飛詩集序

延祐首科國人暨諸部列右榜者十六人幸獲魚兔委其筌蹄與夫不以一得為足汲汲所未至者亦各播人耳目有不得而揜者焉唐古氏張君雄飛首科右榜有聞者也不以一得為足益礪其學尤工於詩徃徃膾炙人口佳章奇句不可悉舉拜御史西臺按巴蜀越雋足

跡殆盡西南履少陵之躅默有契焉移南臺行嶺海窮  
極幽險僉浙東憲過錢塘登會稽探禹穴天台鴈蕩之  
勝舉在心目得江山之助故其詩益昌而多也矣言之  
精絕者為文文之精絕者為詩然昔人有文章妙一世  
詩句不逮古人之言亦有文章不傳獨以詩顯者工部  
三賦他無聞焉非無文也以其所長揜之也雄飛既礪  
其學而詩又其尤長者乎移僉湖南過余瑯琊山中出  
其藁古律詩共若干首屬序其端愚因以得悉其多也

且作邑而有惠佐臺而有聞司憲而有為礪學又不已  
不獨資為詩將澤於道德仁義致其遠者大者其可尚  
也哉吾同年之得人可不謂盛矣乎

成中丞詩序

元統癸酉南陽成公誼叔既擢第官翰林學日益進名  
日益振仕日益顯為河間轉運使弟有孚嘗過之談其  
政不釋誦其詩又勝所聞於是知誼叔不以一第自滿  
力進修而志遠大者也中臺政府數歷俄徧御繁肩重

著作不輟分省於相相吾里故尤悉其政適林慮有警  
乘其未備而弭之有詩曰林慮清固已嘉其有為而詩  
不苟作也時方急賢召入尹京刃甫發劓復拜左丞出  
鎮大名尋拜御史中丞召歸皇上以羣醜未殄將帥翫  
縮非聲實素孚健有力者巡行督治未易即工詔分臺  
率僚屬事賞罰興除俾專處決其任重矣客陳君彥博  
輯詠叔詩二百七十餘首請序其端卧病寒齋因得盡  
讀皆有關於世教而無苟作也詩言志爾斯行可以言

志矣昔元結作春陵行魚賊退後示官吏二首老杜謂  
今盜賊未息知民疾苦若得結輩十數公落落然參錯  
天下為邦伯萬物吐氣天下少安可待矣不意復見此  
興體制今誼叔為宰執天下皆在鈞陶中豈特邦伯而  
已哉他日事業將百春陵見之歌頌者又將鳴邦家之盛  
不但言志而已也是為序

宋顯夫文集序

予卧病田廬有禁近之召迫命就道惶汗無措而復竊

自喜幸故人宋君顯夫實直學士協恭侍從自公論文亦一樂也比予入京而顯夫卒矣予病亟歸不得省其孤承詔復來顯夫已贈國子祭酒諡文清思而不可見惜哉孤籲奉燕石集拜且泣曰此先子所遺兄彙編次者也世父至治集公實序之敢援例以請予序誠夫文不一紀又序其弟人之生世其可悲也夫昔顯夫兄弟入京首與予同游盡賦予所著睽離有作必寄故知其長蚤且悉也及閱顯夫藁則未相識時歌詩已嘗及予

重以三十年分誼之篤序可辯乎國家設貢舉陶天下以經術餘三十年文當日益昌而名能著見者何其指之不多屈也積儲之不厚也造詣之不遠也取而隨竭發而自杞拘拘規倣而俛俛乎所適者欲昌得乎惟其有所本也有所叅也該洽沈潛心有所得濟以定力而熟之則於辭也決淵渟而灌溝澮策堅良而走康莊庶乎其達矣顯夫登甲子科考其作未有貢舉前已汨汨矣視誘利祿而重失得忽於揣而急於穫者不有間乎人



知其才而不究其積儲造詣之有素也不竭不杞而又  
有進焉故予序其集而原其得俾後之觀者有激焉集  
凡若干卷文若詩樂府若干首自名燕石然世皆信其  
為玉也曠由奉禮郎為丞相東曹掾彙從父之文不使  
遺逸不愧顯夫之於誠夫矣顧甫襄事即謀刻父文宋  
之後其亦昌矣哉

文過集序

丁丑分省予以五月二日發京師八日達上京大臣日

侍帷幄時陪論奏退則入省治常事軍國幾務一決於中而京師留省百事所萃必疑不決暨須上聞者始咨報故分省簿書常簡參議左右曹非有疑稟不至都堂日長吏退恒兀兀獨坐間得朋游歌詩率爾賡和心有感觸亦形詠歌乘興有一二十首而無心營度一字亦復動涉旬日七月十七日奏歸日定有司次第治行予亦諭僮僕橐衣以俟諸生李冕掇拾繆作得百二十首予視歎曰夫士之窮者乃工於詩予竊祿逾涯人不謂

窮也謂予不窮則昔人以道不行為窮方今玄象示儆  
獠夷弄兵浙人號饑中州告水官瘵民疲財瘁粟耗而  
予覲顏執政道果行乎悲夫子蓋窮者也窮者詩宜工  
而復不工何哉彼之窮斂其心力一寓於詩予之窮雖  
疲精竭神於所當為而識淺才劣卒不能為至於詞章  
小技亦遂俱廢彼之窮猶有詩予之窮併詩而無有而  
不工猶無也予其窮之尤者乎而不工之語時託箴諷  
滕口說說者又小人之文過也因題文過集以識予過

因以見小人之志又有不在於詩者焉



圭塘小藁卷五